

THRU THE BIBLE MINISTRIES**BROADCAST SCRIPT****Programme ID: n°0075****Language: Baoulé****Book (livre): Matie N° 4 :21- 5 :1****Nde tre nnan (4)****I mma 21-22**

Ngoa nga i kanle nun'n, be wandi fuan be wun, o ti ngoa kun bo kaci kaci. O yi sran'm be aklunjuen i nglo . Wie nun -on, sran wie'm be klo i kpa , wie'm be kusu'n, be klo-men, ye be si su akploa dan kpa. Be nga be ta nanmue'm be nun ko mun, ye be te i solie yo-o. Sangε, jue trale'n ti-man so. O ti juman kun bo ti diin'n, ye be nga be klo aunjuen be ye be di i so juman ni-on. Be kwlaa nga be ti jue trafuen, be si lika kaka yo. I klikli su'n, jue trafue le awlen trale, afin jue'm be nun dan dan mun , be trale yoya. Be nga jue trale nti be juman'n, te ye be fa tra jue mun-on. O man, o nin fata ke be mindε, ye be nyan sunzunle, afin nan cen ngba ye, jue trafuen'm be tra jue kaka-o.

Ngō su i su ekun'n , yele ke, , se alema ye e fa ko jue'm be trale'n, o ti-man juman kun bo, be de wumien nun-on o yo ye -o. O ti-man juman pōpō. Bian kun bo suan, ERNEST Hemingway, kenni i nde i fluwa ngo tōenni i duman "*bian kpengben nin jenvié* ",I nun.

O nin fata ke jue trafue mun, be nyan awlen trale nin kekle jranle nan ba kwla di be juman . Se be nyan-man jue lika kun'n, be ko lika ufle ko to koa , kpekun be fa be sulafile fa uka su , ye man be nyan jue be tre i-o. Be kwlaa nga , afue ya klikli nun'n, be yoli jue trafue Gallile fetε nun'n, be ti sran bo , juman kekle-ekle dile'n, nin ju-man nun afen, kongue nin wiassu'n, o a si be wun. Be o jue dan

dan nin aangan nin jenvie nin blé'm be afien cén kwlaa. I sònti'n man, be ti wun ase kanfue'm ye be di be sa bui, be mindé blé kpa.

Gallile ló'n ,jue trafue dandan mun, be ti sran bɔ be juman nun afé sili be wun. Be be nzuen i wafa ngo fa ti'n su : *be wun ase kanlé, mindelé,nin sulafilé, nin kekke jranlé*, be kwlaa sɔ'n , be ti nzuen kpa. O man ,ɔ bo man e nuan ké, Gallile fɛtɛ'm be nuan ló ye, Jesus ɔli ko kpali i sɔnzɔnfue klikli nga be a kacili i akoto mun-ɔn. Be kwla kaci sran trafue anze jasinfé bofue afin be wun ti siesie wa. Ké be a wlu krist i suklu nun , nin i kwlaa ti ɔ a ya.

I mma 23-24

Ntɛ su Matie ndɛ tre nnan sun in kanganlé.

« ²³ *Jesus wlan-wlan Galile akpasua'n kwlaa su, ɔ kle like Nyanmien ndɛ suanlé nin i srɛlé sua'm be nun , ɔ kan Nyanmien i siele'n i jasinfé'n kle be , ye ɔ wie tukpace kwlaa b'ɔ o sran'm be wun'n nin be wunnen ya'n kwlaa.*²⁴ *I duman'n fuli siri mɛn wumuan'n nun. Be fali be kwlaa nga tukpace fanun-fanun o be wun'n bɔ be wunnen yo be ya'n, nin be bɔ asié usu a saci be'n, nin ngbitiefue mun , ɔ nin bubuwafue mun bleli i , nan ɔ a yo be juejue.(Matie 4v23-24) .*

Jesus yoli sran klofue dan, ɔ kɔ klɔ klɔ'm be su, yo sran'm be ye . O ti ké andɛ e blé nga su sa'n, i sɔ blé nun kusu'n, ndɛ'm be trulé yo-man ya. O man jesus duman fuli ndɛ ndɛ kpa Gallile wumuan nun, lele juli , Syrie bɔ ti nvle ngo mantan be lé i nglo ló lika liɛ nun. I kusu'n, i wlanlé kaka ti i ja-nun, anze aflumun'm be su, aféfue'm be ti. Jesus kle sran'm be nyanmien ndɛ, ɔ bo nyanmien jasinfé, ye ɔ yo sran'm be juejue. Ndɛ nsan sɔ mun, be bo juman ngo dili i kpɛlé.

Anuanze ufle i blé nun'n, sran'm be juejue yole'n ti kekke. Ngo kan, ye vinaigri kan. Ké e kangan matie fluwa'n, e wun i ké sran'm be ba ya ya nin akpi akpi, nan ɔ yo be juejue. I sɔ duman nun ti'n, i kpɔfue mun be kwla tɔn-mɛn I wun

suɛn kɛ, ɔ a yo-man sran'm be juejue ni-ɔn. Afin, ɔ yo sran'm be kwlaa be nyrun lika kwlaa. Be kɔman mmua nan ba wun lalofue mun nin be nga be yoli juejue mun be lalo.

Kɛ e wlu jasinfe nun kɔ mua'n , e wun i kɛ jesus ijɔ kle aangban nin jenvie'n. Andɛ blɛ nga nun , sɛ sran wie yi atrɛ kɛ krist sa'n, ɔ yo sran'm be juejue'n, ɔ kpɛ sanganɛ ba, yɛ sran'm be tu si be wun. Ɔ cɛ-man nan ɔ a kundɛ sran kɛ be sɛsɛ i , kɛ o ko yon an ba kun-mɛn i nti , yɛ sran nga be o mɛn wumuan nun'n be flɛ i lika kwlaa. Wie'm be mɛn I sika kpangban kpa , i juman sɔ ti. Sangɛ mi liɛ'n , nga nwun i , yɛlɛ kɛ, ɔ su yo-mɛn i wun sa ye. Dɔtrɔ mun be jaso i wun, yɛ be nin i be kun . Wie nun kusu'n , be jrɛn i, be fɛ kɔ jɔlɛ difue'm be jasu , yɛ be wlɛ i bisua , afin be se be wun kɛ ,ɔ ti-man dɔtrɔ.

Matie yili ngbacɛ ngɔ o, be nga be tukpacɛ'n ti wunnen nun tukpacɛ, ɔ nin be nga wawɛ wie be'n i nglo. Ɔ yili wawɛ ngɔ o sran su'n, nin be nga ngbitiɛ bɔ tra sran yi be ase, i nyin blu'n , be ngbacɛ i nglo ekun.

Jasinfe fluwa mun, be kan-man be nga mmussu wie wa sie be'm be ndɛ, sange be kan sran kun bɔ, wawɛ tɛ wie ɔ a kɛndɛn i su , bɔ o i nun i ndɛ.

I mma 25

Nsu kangan Matie ndɛ tre nnan i ngba.

« *Sran kpangban kpa be fin Galile nin kb blu asa'n su, nin Jerusalem nin Jude akpasua'n su , ɔ nin Zurɛn'n i sin lɔ'n be su i su.* »**(Matie 4v25).**

Sran'm be fin lika wumuan be nun, yɛ be ba-ɔ. Wie'm be fin Palestine nvle i mua lɔ yɛ be ba. Be fin Jerusalem nin Jude nvle nun, lika nga Jesus boli i juman i bo lɔ'n. Matie kanni klɔ blu be wun ndɛ ekun. Lika sɔ'n wo Gallile i wun mua kpa , nvle i ngua lɔ lika lika liɛ nun, ɔ nin Jurɛn i wia afileɛ lɔ, ɔ o andɛ klɔ nga

be flɛ i Jordanie nvle i nglo lika liɛ nun lɔ. I sɔ nvle liɛ'm be nun, be nga be o lɔ, be ti-man Juif, yɛ e wun i sran sɔ mun , nan be ngba yɛ be ba kɛ be ti Jesus i nyanmien ndɛ ni-ɔn. Sangɛ, be bali kɛ, ɔ yo be juejue, yɛ ɔ de be , be nvle nun klunwifue'm be sa nun.

E wun isɔliɛ i wlɛ kɛ, Jesus wun ti siesie wa kɛ, ɔ uka be nga be kle be yalɛ mun. Kanzɛ be afɛ'n ti sɛ o, ɔ uka be , afin ɔ klo kɔ yi ,i anvue sile nin i nguan su kasiɛ'm be nglo. I sɔ kungba su'n, ɔ yi wun nglo kɛ ɔ ti nyanmien sran bɔ di nanwlɛ, bɔ be lafi su -ɔ , ɔ yo ye. Ndetre ngɔ su i su'n, Jesus fali blɛ tɛnden kpa kle li sran'm be like , i famien diwlɛ'n su. E kwla lafi su kɛ, be nga bɔ Jesus yoli be juejue'n , be dɔuun lika be tranni like klelɛ sɔ'n i bo , afin ɔ a du-mua ɔ a yo be ye, ɔ man ɔa tra be akundan i ase.

Anien ngɔ siesieli e mi i atin, bɔ yɛlɛ Zan batem yofue'n, ɔ a kpɛli. Jesus I nyrun mua dinfue'n , ɔ-a fa lika wa man i min. Jesus liɛ'n, Zan batem yofue'n i tralɛ'n , ɔ yoli dɔ kun bolɛ, afin kɛ i sɔliɛ sinni'n, yɛ Jesus boli nyanmien i siele'n , i su ndɛ kanlɛ- ɔ.

Krist ti-man nyanmien nuan ijɔfue kɛ Zan batem yofue'n sa, bɔ tren i gummi aawle flennen nun -ɔn. Sangɛ i liɛ, ɔ kle like nyanmien sua mun be nun, yɛ, ɔ wlan klɔ nin nanmue'm be nun. I bo bolɛ nun, ɔ boli ijuman bo Gallile lɔ, ɔ nin Paiɛn'm be nvle i anyalie be su, Jerusalem bɔ ti mɛn-mɛn mun be yalɛ nvle'n, i wun mmua kpa. Zan batem yofue'n i batem bɔ yoli i nun'n, ɔ fɛli i wun kleli, sangɛ sien'n, sran'm be juejue yolɛ nin wawɛ tɛ'm be fuanlɛ nun yɛ , ɔ fɛ i wun fa kle sran mun -ɔn. Nyanmien kasiɛ ngɔ boli i famien diwlɛ'n su'n i blɛ wa ju sien. Kɛ Pierre nin Andre nin Jacques nin Jean be bu i sɔ, i ti yɛ be su Jesus su ni-ɔn.

Ndɛ tre nnun

Ndɛ su fitilɛ klikli

Ya ju Matie nde tre nnun su sien. I nun'n, krist fa famien i jajale mun kle ye.

Nyamien i famien diwle'n, i nun jajale mun , ye e fle i “**jesus i oka sulo like klele ni-on**”. Like klele so'n, yo ti Jesus-krist i nyanmien nde ngo kleli be'n, be nun tenden ni-on. Matie i jasinfe nun'n, nde tre dandan nnun o nun, ye i nun nsan be ti cinjin kpa. I klikli su'n, nde nga ngummi ti tre tre nsan, kpekun,i famien diwle'n su nyandra nde mun, o nin, Olivié oka sulo like klele , bo su cen nga be wa tre I su'n.

I nyanmien nde klele nnan su'n, o o zan i jasinfe nun. O taka asonun su, o nin nyanmien wawe i juman nga o a di i kristfue i nguan nun , kpekun, aengue ufle nga sran nin nyanmien be trali bo, i boa se wlale'n taka krist i bobole nin i wule waka nda su , o nin i wie nun cenle.

O ti cinjin ke e tra Oka sulo nyanmien nde ngo kleli i ase, afin nyanmien nde ngo kleli be'n, be kwlaa be ti kle wa nyanmien nde fluwa wumuan nun. I nun nde kungba so wie o jasinfe onga 'm be nun lo. Afin, jesus kanni nanwle nde so mun flanni nun kpe kaka, kpekun, o jran i lika wie'm be su , o yi yi li nun kpa kle sran mun.

Man e wun I wle ke ,se sran kpangban be bu I ke be si jesus nyanmien , sange man e si ke, be nga be fa ble , suan i oka sulo like klele'n, nan ba wun i wle,nan ba di su'n , ba son-man mlonmlon. Jesus-krist i nde so mun , be wlu e klun lo ,lele ju e awlen nun afin ,o kle nyanmien nde nin nyamien bo le tinmi i fangan nin i kwlae.

Ble wie juli , nan nyanmien nyrun jranfue'm be a fali akpue ke be jran Jesus i nyanmien nde kanle nvle i lika.O man be su-man Sonja mun ke , be ko jren i , sange be ko I jranle-o, o yoman ye. Nyanmien nyrun jranfue kpengben nin Farisfue'm be usa be ke: **nzu ti ye amun a kwla tre-men i-o?** Ye be teli be su ke: **sran fin an ij-man ke bian ngale sa le.(jean 7v46)**. Men nun sran'm be nan ti-man nyamien nde fefe nin nyanmien kanfue ngo le kwale ke ngale sa le.

I nyamien nde i bo ti kplouun, kpekun o ti kpe kan, ye o ti-man ke , be nga be sinni be lie'n sa. O ijo fangan su, sange nyanmien wawe'n ye o tinge i o.

Jesus- krist I nde ngo kan be'n be nyrun'n, e kan e wun ase. Sran kun wun i sate nin i fonle mun , afin nde ngo fin i nuan fite'n o wu-o e kwlaa, ye e akundan nun like nga be ti fiawa'n be fite nglo weiin e awlen'm be nun.

Ka- nan e a wun Jesus i nyanmien ngo kle i wle'n , o nin fata ke , e nian like nyon nga su kpa.

I klikli su',o ti cinjin ke e bu, jesus i oka su lo nyanmien nde ke ,o ti kristfue kun i nguan i jajale atin klele. Ye, man e fa nyanmien nde so ke, o ti nyanmien nde bo i cinjin tre i onga mun. Nyanmien nde suanfue kaka kpa be jranwle ye o o le-o. Sange be klo wunnen nun ninnge mun tra wawe nun anze atre ninnge mun . Be bo jesus-krist I nyamien nde 'm be kpele ke jajale nde ngbin wie sa. Nde ke, nan yo o wiengu te sange , man e klo ye wun. Be jranni jesus i nyanmien nde ngo seli ke: ***Nga amun kloke sra'm be yo man amun'n, Amun yo I kungba be(Matie 7v12)***. O ti kpa sange, wan ye , o klwa di nde so su i nguan nun cen kwlaa-o? I kusu'n, nyanmien nde nga jesus kenni I oka su lo'n , o taka nde tre nsan su. O man, nde kpe kan so'n ,o yiye –men i ngba nun weiiin.

O ti-man kpa ke , sran kun bu i ke, ke be se ke, sran kun ti kristfue kpa, nin o a di krist I mmla be kwlaa su. Se oka su lo nyanmien nde ye, nyanmien klo ke ndi su'n, nzu sran ye nwa kaci-o? Afin , man e kan, nde so i kwlaa su dile yo-man ye nsa nun, ble kwlaa nun mi ngua nun. O man ,se mi wan ,nsu nian nde so su nanti nan nyamien so mi nun'n, nin man wla mi wun bi sua.

Ke be kan jasinfe nde'n , nan nyanmien nde ngo kanni anze nzolie ngo kleli ni-on, sange like ngo yoli ye ti jasinfe ni-on. E fo bule'n toli i su waka nda su afin, nle-man fangan nfa-man nyanmien i mmla ngo fa manni Moise su , anze anuanze ufle bobo i nun mmla'm be su. Afin be su fale ti kekke tra anuanze laa nun lie mun. Anuanze ufle i fluwa kun nun'n, be seli ke :

« Afin sran ngo fa mmla'n kwlaa su b'o yaci kun'n , wuun o'a saci i kwlaa. »

(Jacque 2v10)

Sran ngo fa sie'n o fa sie, nzuen nyon ngo fata ke e yi i nglo oka sulo nyanmien nde su'n, yeke ke, o fata man ke e bu i ke , be nga be wlu nyanmien i famien diwle nun, ble nga o a wle i bo ase be ngummi be li-o .I so akundan ti kpa, afin Jesus i like ngo kleli i oka sulo'n, i kungba ye, o o anuanze ufle i fluwa wumuan be nun-on. Jajale ngo o fluwa nga be kleli ko manni asonnu wie mun anze sran wie mun , o flan jesus i nyanmien nde'm be nun, ye o yiyi nun kpa bobo, kpekun be fa yia'n jristfue wie'm be nguan nun sa wie'm be nuan.Se e wan e fa sunzun sa wie'n, e kwla se ke , Jesus i oka sulo nyanmien nde ngo kanni'n ti ke, kuran su canni sa bo, ka nan o a so'n ,be wla nun pili'n sa. Sange kritfue'n i fangan i bo fin nyanmien wawe. Nyanmien nde nga Jesus fa kleli nzrafue so mun'n, i bo yeke i famien diwle i nun jajale'm be nun yiyile.Ison'ti, o fali famien i jajale mun kleli be. Ye, famien diwle so'n, i bo ase wlale'n i nuan o ya afue akpi kun i ble nun, bo ti krist i afue akpi famien dile'n asie su wa. Sange, do nga su lie'n, be klwaa nga be so krist nun, bo i duman o be su'n, bo be soli i nun ke be min sa'n, o nin fata ke be fe i jajale so'n ke, mmla sa ,be nanti su.

Sange, man o tran e akundan nun ke, se nfeli i wumuan su bobo'n, nan i so'nti ye man krist somin nun-on, anze nyo sran kpa , bo nyanmien bo yili nglo nin asie'n o so mi nun-on. E nin nyanmien e kwla diman aata afin o ti-man aata difue.

I bue kun lo'n anuanze ufle nin jesus be kan be tin su kpa ke, nantile kpa ti cinjin nyanmien nyrun, ye bue kun ekun su'n, o kle e ke, kristfue nanwlefue'm nin yakpafue'm nyanmien juman nun, krist o a tua be kale nyanmien su lo. Su lafile cinjin'n, o yi i wun nglo e nantile nun nin e nyolie kpa ngo jo nyanmien klun be nun. Sange, se i so nu-man e nun'n, o kle ke e sulafile'n ti ato , ye e diman nanwle. Nlie'n nklo jesus i oka sulo nyanmien nde, afin o yo man ,nwun wafa ngo fata ke , nfa nanti nyanmien nyrun -on. O fa mlinfue'm sie i atin su anze do su , se nklwa se.

Oka sulɔ nyanmien nde'n, i nun akundan ufle kun ye. O yili i nglo kleli sran'm be ke, nyanmien I saun ngo ti 'n, o o like kwlaa ti su, ye e kwla wun-men i sin kaan sa. Ye nle-man fangan, nfa-man mi wun sunzu-man nyanmien i saun i wafa ngo fa ti, i son'ti ye, o fata ke, ble kwlaa nun'n, nkpan fle i anvue-sile ni-on. Jesus si be nga be wun i ke, be le-man fangan be Anvue, be wun fo bo be bu I nyrun'nti.

Oka'n su lo nyanmien nde nga Jesus kleli' n, o nin nyanmien mmla blu'n ti man kun. Moise i mmla'm be su fale'n, o ti nzuen kun bo e yi be nglo weiin, ye be su fale ti kekke. Be ti sa wie'm bo fata man ke e yo be, ye wie'm be kusu ,o fata ke e ya be nuan. Sange, oka sulɔ nyanmien nde , i bo ti kplouun,afin o kan e klun lo nzuen i nde . Jesus su kan kle e ke, e akundan nin e nyolie'm be kwlaa be ti cinjin ke wafa nga nfa nanti nyrun sa.

Man e fa sunzun ke, mmla se ke: ***Nan Kun sran***, nga ye be fle I mmla niɔn. Jesus lie'n , o yiyi nun ke, sran kunle bo i bo e awlen nun. I so ti ye ,o seli ke: ***sran ngo fe I niaan wun ya ,o fata ke be fe I wo jole difue ja su niɔn.***

Mmla se ke: ***nan kundɛ bian o wun bo , anze bla o yi bo*** . Sange, Jesus lie,o se ye ke : ***se sran kun wun bla kun nan, i konvi o li i su ke, o nin i be la'n , nin ,o a dumua yo satɛ I awlen nun. E kengen i Matie5v28.***

Amun nian oka'n sulɔ nyanmien nde nga Jesus kleli'n , i bo ti kploun tra Moise mmla mun, sange Akoto paul kleli ke: « ¹⁶*kanze e ti so'n , e si ke nyanmien bu-man sran fi sran kpa mmla'n bo fa su'n ti, sans Krist -jesus su bo sran lafi'n ti ye man nyanmien bu i sran kpa-a. E kusu, ke o ko yo nan nyanmien a bu e sran kpa Krist bo e lafi i su'n ti'n , nan o'a yo- man ke mmla'n bo e fa su'n ti ye o bu ye sran kpa'n i ti ye e lafili Krist-Jesus su-o. Afin nyanmien sub u-man sran fi sran kpa mmla'n bo fa su'n ti.»(Galate2v16)*

○ man , mbu akundan sɛ? Blɛ kpe kan nga'n, sɛ fa Jesus i mmla'm be su'n, nyanmien sɔ mi nun? Ntɛ su kɛ, nlɛ-man fangan , nan man di Moise i mmla'm be su, yɛ fangan onin yɛ , nklwa nyɛn i nan man di Jesus i oka su lɔ nyanmien su-ɔ? ○ ti kekle man mi.

Matie ɔ a faman Jesus i nyanmien ndɛ sɔ'n, i kanlɛ blɛ ɔ a kloɛ-man ye, I juman dilɛ'n i blɛ i afiɛn nun, sangɛ, ɔ kanni nyanmien sɔ'n i blɛ nga bɔ, ɔ wieli i sɔnzɔnfuɛ'm be kpa, bɔ boli i nyanmien juman bo, i sɔ blɛ nun-ɔn. I akoto mun yɛ ,ɔ kenni i sɔ nyanmien ndɛ liɛ'n kleli be- ɔ, sangɛ, ɔ kenni i sɔ nvle i liɛ wie. Afin, blɛ kwlaa nun'n , sran kun ɔ lɛ bɔ, fɛ i su sie i nuan bo titi-ɔ. Yɛ i nyanmien sɔ'm be kan sran sɔ i awlɛn , ○ man , ɔ kwla yo mi anzɛ amun.